

Rau Ite Imin Ru Tau Paulus Iboode Pa Yes Korin 2 Korin—2 Corinthians

¹ Yau Paulus. Maaron itaghon tauu loolo ve ighur ghau namin mbanooŋa to Yesu Kriisi. Yeiru tonvetaz toit Timoti, nibood rau tane ilat pa lupuuŋ to Maaron tau aleep izi nugh Korin na. Ve yam mon mako. Rau tane ilup gham tomania Maaron tamtamon tooni patabuyaana tisoov tau tileep irau taan sirivu to Akaia na paam.

² Poia to Tamaan Maaron ve Tiina toit Yesu Kriisi aat iza tsiam, ve tingin gham aleep poia toman lolomim luuma. Onoon.

Maaron iuluul ghiit pa pataŋani toit, lesu tauul zetaanŋa pa pataŋani toozi

³ Loloon poia pa Tiina toit Yesu Kriisi Taama Maaron, ve tapaiti pa poia tooni. Pasaa, i loolo isasaghatin ghiit ve iuluul ghiit. I Maaron tau iravrav ateen ve ipapalot ghiit irau saawe. *

⁴ Saawe isov tau iit taleep ila pataŋani loolo, i iravrav ateen ve ipapalot ghiit. Leso anaan tapalot zetaanŋa siriv tau tileep ila pataŋani loolo na, ve tarav atezi. Pasaa, uleen tau taghamghamu ila tooni, ene ipapalot ghiit. Tauta iit irau tarav zetaanŋa atezi ve tapalot zi. *

⁵ Onoon, iit tau tataghon Kriisi ne, tabadbaad pataŋani naol imin i tauu. Eemon isaav ighe

* **1:3:** Ep 1:3; 1Pe 1:3 * **1:4:** Ro 15:5; 2Kor 7:6

tabaad patañani tintiina, ene pale i tauu irav ateen, ve tagham palotiinj tiina ila tooni. *

⁶ Saawe tau yei nibaad patañani, ene to iuul gham, leso ayooz ariaañ pa taghoniinj eez to Maaron, ve i igham mulin gham. Pa igha Maaron ipalot ghei gha niyooz ariaañ, ene pale ngar tau yei nighamu ne, ipalot gham paam ve ayooz ariaañ pa badoon patañani imin yei. *

⁷ Tauvene yei nighur ila ariaañ nighe: Yam pale ayooz ariaañ. Pasaa, yei niwatagh: Isaav igha itinja talup ghiit pa badoon patañani, ene pale Maaron irav ateen ve itinja tagham palotiinj ila tooni. *

Paulus ipaesia patañani tau ivot pani izi taan sirivu to Asia

⁸ Yam tonvetaz, yei nighe yam awatagh patañani tau ivot payei izi taan sirivu to Asia. Patañani tau ivot payei na, tiina kat. Irau nibaado mako. Tauvene saawe tana, nigham ngar nighe irau nileep mako, pale nimaat. *

⁹ Onoon kat. Saawe tana, nighita nighe lemai eez eta muul mako. Yei nimir njeer tau tigabiiz saveen tooni ve tigha i aat imaat. Eemon patañani tawe ivot payei, leso ninumeer taumai sov, ve ninumeer Maaron. Pasaa, i mon ta irau ipaburigin yes mateegha. *

¹⁰ Tauvene patañani tiina tau ivot payei na, ene imin ta yei nileep ila naal aavo. Eemon Maaron igham mulin ghei pa patañani tawe. Tauta yei nighur ila ariaañ nighe murei, isaav igha patañani

* **1:5:** Mbo 94:19; 2Kor 4:10; Kol 1:24 * **1:6:** 2Tim 2:10 * **1:7:** Ro 8:17 * **1:8:** Mbanj 19:23+; 1Kor 15:32 * **1:9:** Yo 5:21

ivot payei muul, i pale igham mulin ghei. *
 11 Eemon yam aat auul ghei ve aghur ghei ila sunjuunj tsiam. I pale iloonj sunjuunj tsiam, ve iuul ghei itaghon tauu poia tooni. Leso yamņa eval tiina lolomim poia pani, ve apakuru. *

Paulus ipaesia puughu tau itoor ngar tooni ve ila Korin mako

12 Gabua tiina ee tau yei nipakur ghei pani, ene vene: Niyamaan ila lolomai nighe: Ngar tau nighamghamu irau nugh nugh ne, nitaghon ngar tau tamtamon to taan tipaiti ne mako. Poia to Maaron, tauta ipapaburigin ghei gha nibesbees pani toman lolomai eemon, ve nighamgham ngar tau ingalaan ila i maata. Ve ngar tane, yei nitotoi katini payam. *

13-14 Ve saveenj tau niboode payam na, puughu eta iyoonj mako. Saveenj tsiei isov, ngara igheen ghazonja. Irau awaato mon ve aghazonj pani. Onoon, saawe tane, yam siriv aat aghazonj payei geeg soone. Eemon naghe le ngar tsiam ivot ve aghazonj kat payei. Leso saawe to Tiina toit Yesu imuul ilam, yam tintinmim payei, imin yei tintinmim payam. *

15-16 Muunj, yau naghe yam tintinmim payau ve uraat tsiau. Tauta saawe tana, matag ingal naghe nalat naghit gham imin maata. Le isov, o nala taan sirivu to Masedonia. Ve saawe tau napul Masedonia, mako namuul nalat naghit gham muul, ve yam aghur ghau gha malmalig nala pa Yudea.

* **1:10:** Ro 8:35+ * **1:11:** Ro 15:30+; 2Kor 4:15; Pil 1:19 * **1:12:** 1Kor 1:17, 2:4, 13; 2Kor 2:17; 1Tes 2:10 * **1:13-14:** 2Kor 5:12; Pil 2:16; 1Tes 2:19

Leso Maaron ipalot gham pai ru itaghon laghoon ru tau naghamu na.*

¹⁷ Eemon ngar tsiau tana ighur mako. Onoon, imin maata, yau nasaav payam naghe: “Yau pale natal.” Eemon murei, nator alinag naghe irau natal mako. Ve yam aghit ghau mindai? Aghe yau nagharaat poghania ngar tsiau mako, tauta natortoor alinag? Ma aghe naghama karom ve nambu sorokin saveen imin yes to titaghon ngar to taan, tauta saveen ru, “Vee” ve “Mako” ivotvot ila avog, ne? ¹⁸ Aloon. Maaron toit, i isasavia saveen onoon mon, ve itataghon saveen tooni. Ve yei tauvene paam. Irau nitortoor alinamai mako.*

¹⁹ Pasaa, Maaron Naatu Yesu Krisi tau yau gha Silas ve Timoti nivotia vaaru payam na, i itortoor alinai mako. Isaav ighe i imbu saveen pa gabua eta ighe: “Vee, yau aat naghamu,” ene irau itoor alinai muul mako. Saawe isov, i itataghon saveen tooni. Ve ila uraat tooni, Maaron isaav: “Vee” pa saveen mbuaan tooni ta naol ne.*

²⁰ Pasaa, saa saveen tau Maaron imbua, ene Krisi ta igham uratoini gha anoonai ivot. Tauta monmon isaav ighe tapait Maaron eeza pa tapiri ve poia tooni, iit tasavsav taghe: “Onoon” ila Yesu Krisi eeza.*

²¹⁻²² Maaron tauu ipapalot ghei tomani gham. Tauta iit tasov taleep tunia ila to Krisi. I isiigh ghiit tamin le, ve ighur Avuvu Patabuyaana ila loloon wa. Avuvu tane imin ilaal pait ighe iit tamtamon to Maaron. Ve imin puughu pa gabua naol tau

* **1:15-16:** Mban 19:21; 1Kor 16:5+ * **1:18:** 1Kor 1:9; 1Tes 5:24

* **1:19:** Mban 18:5 * **1:20:** Ro 15:8+; Syg 3:14

pale Maaron igham pait. Tauvene iit tawatagh: Saa gabua tau Maaron imbu saveen pani na, i pale igham pait. *

²³ Saveen tau naghe nasavia ne, ene onoon. Maaron iwataghi. Puughu ta nalat mako, ene vene: Yau lolog pa nasavia saveen ariaaņa payam, ve naghham gham lolomim isaghat sov. ²⁴ Aloon. Yei nighe nitatan gham azi, ve ningin ghuruun ila tsiam ne mako. Pasaa, yei niwatagh: Yam ayooz ariaaņ pa ghuruun ila tsiam wa. Yei nighe itiņa talup ghiit ve tagham uraat. Leso niuul gham ve aleep toman lolomim poia. *

2

¹ Pughu tau nalat mako, ene vene: Papazoge tau nalat tsiam, naghham saveen ariaaņa payam, ve igham lolomim isaghat. Ve ngar tsiau iyaryaņ naghe gabua tauvene ivot muul sov. Tauta nalat mako. ² Pa ighe naghham lolomim isaghat, ene pale savunugha tigham ghau lolog poia? Mako. Pasaa, yam tau navaghmunia lolomim na, yam mon ta irau agham ghau lolog poia. ³ Tauta taug nalat mako, ve nabood rau ilat to napaduduun gham. Pa naroi: Isaav ighe pataņani igheen sosoon ve nalat, ene pale agham ghau lolog isaghat. Eemon yau naghe le yam agham ghau lolog poia. Ve yau naghur ila tauvene: Ighe ataghon ngar tau igham ghau lolog poia, ene pale yam asov lolomim poia paam. ⁴ Rau ariaaņa tana, matag suuru izizi ve naboode. Pa naghham ngar naol payam, ve lolog

* **1:21-22:** Ro 8:16+; 2Kor 5:5; Ep 1:13+; Syg 7:3+ * **1:24:** 1Pe 5:3

ipataŋan kat. Yau nabood rau tana to navaghamunia lolomim mako. Naboode payam, lesa aghilaal aghe lolog igheen tsiam kat. *

Yes Korin irau tipul sosor to neer tau igham sosor

⁵ Neer tau muun igham ghau lolog ipataŋan na, i igham sosor payau mon mako. I igham yam asov lolomim ipataŋan paam. Eemon irau nayau avog pa gabua tane geeg mako. Pa aat naghham neer tana loolo isaghat. *

⁶ Sosor tooni atuya tau yam eval aghuru pani to anŋal maata na, ene irao. ⁷ Tauvene aazne, yam irau apul sosor tooni, ve arav aate ve apaloti. Mako pale loolo isaghat le isaghat kat, ve pataŋani tana itatani. *

⁸ Tauvene yau naghe napalot gham to atotoi ngar poia pani, lesa iwatagh ighe yam lolomim igheen tooni.

⁹ Puughu tau nabood rau ariaaŋa tana payam, ene vene: Naghe natoov gham ve naghita: Pale ataghon aliŋag pa ngar ta naol ne, ma mako? ¹⁰ Ve yam aloon aliŋag ve aghur atuya pa neer tana wa. Tauvene aazne, yam irau lolomim isaghatini ve apul sosor tooni. Ve isaav ighe yam apul sosor to tamtamon eta, ene yau paam, napul sosor tooni. Saa sosor tau i igham payau na, ila Krisi maata, yau napul sosor tooni. Ene poia to naghham tauvene, lesa nauul gham. ¹¹ Tauvene iit irau tapul sosor tooni. Mako pale Sadan itombaan ghiit ve iliiv ghiit. Pasaa, iit takankaan pa Sadan ngar tooni

* **2:4:** Mbanj 20:31; 2Kor 7:8+ * **2:5:** 1Kor 5:1+ * **2:7:** Lu 17:3

mako. Eez maata maata tau i itovtoov ghiit pani ne, iit tawatagh zi wa. *

Uraat tauu to yes mbanjoona

¹² Saawe tau nala navot nugh Troas to navotia vaaru poia to Krisi pazi, naghita naghe Maaron ikaak ataman payau to naghama uraat izi ta sewe.

¹³ Eemon lolog ipatanan, ve naghama ngar naol. Pasaa, naghe pa naghita etag Titus izi ta sewe. Eemon mako. Tauvene yena yes Troasa nivakisi nimamai le isov, ra napul zi, ve naburig gha nala pa taan sirivu to Masedonia. Leso nail Titus izi ta sewe. *

¹⁴ Ve yau napait Maaron toman lolog poia. Pasaa, saawe isov, i imunmuun payei ve ipapalot ghei pa uraat tsiei. Ila uraat to Krisi, yei nimin yes tau tilaagh tomania daaba to zaaba tau iparav ariaan ve iliiv pa malmal tiina. *

Uraat tsiei, ene eez tau Maaron ipaghazonai tamtamon pa Krisi vaaru. Vaaru tawe, ene imin nau-naun poia ee tau vaazi ila irau nugh. ¹⁵ Onoon kat. Yei uraata to Krisi nimin nau-naun vaazi poia tau i igham pa Maaron imin watoonrau. Tamtamon tau nileep ila sosozi na, tisov tinunuz nau-naun tane vaazi. Yes tau Maaron ighamgham uratoi zi leso igham mulin zi, ve yes tau titaghon eez to tilalez na paam. ¹⁶ Yes tau titaghon eez to tilalez na, tinunuz nau-naun tane vaazi poia mako, imin mateegha

* **2:11:** Lu 22:31+ * **2:13:** 2Kor 7:5+ * **2:14:** Isaav ighe zaaba to Rom tilliv pa malmal tiina eta, ene tigherev koiazna siriv gha yesna timuul tila pa nugh tiina Rom. Mako zaaba tawe toman daaba toozi tilaagh ila nugh loolo tomania koiazna tawe, ve eval tiina tigherev zi ve tipakur zi.

vazizi. Ve naunaun tane pale imin puughu pa timaat gha tilalez. Ve yes tau titaghon eez to lepoogh poia na, tinunuz naunaun tane vaazi imin gabua poia kat. Pasaa, itotoi zi pa eez to tigham lepoogh poia ila to Maaron. Uraat tau Maaron ighuru ila nimamai, ene patanani. Sei irao? *

¹⁷ Tamtamon katini tilaghaagh ve tivovotia Maaron aliina imin lezi eez to tiyau maet to tamtamon. Eemon yei nipaak Krisi ve nileep ila tooni, ve Maaron tauu ighur ghei pa uraat. Ve yei niwatagh: Maaron ighitghita uraat tsiei. Tauta nighamgham uraat toman lolomai, ve nivovotia Maaron aliina duduun pa tamtamon. *

3

Uraat tau Paulus ighamu, ene itotoia ighe i mbanjoona tauu to Krisi

¹ Mindai, saveen tsiei tane, yei nisavia imin paitoon taumai muul, leso aghur ila uraat tsiei? Mako. Onoon, tamtamon siriv tikis lezi rau to ipaghazonai zi ighe ezazi pa uraat toozi. Eemon yei lemai puughu eta to nitotoi rau tauvene payam mako, ma nighason gham to abood rau tauvene payei ne mako. *

² Pasaa, yam taumim ta amin rau payei. Uraat tau nighamu ila sosomim gha anoonja ivot, tauta itotoi ighe ezamai pa uraat tau nighamghamu ne. Saveen isov to rau tana ighéen ila yei lolomai, ve

* **2:16:** 1Kor 1:18; 2Kor 4:3; 1Pe 2:7+ * **2:17:** 2Kor 1:12, 4:2; 1Tes 2:5; 1Tim 6:5 * **3:1:** 2Kor 5:12, 10:12

igheen ila yam lolomim paam. Rau tana, tamtamon tisov irau tiwaato ve tigham n̄gar pani, lesu tighur ila saveeñ tsiei. *

³ Tauvene yam taumim amin rau to Kriisi tau igheen ghazooña. Rau tana, ene uraat tau nighamu ila sosomim na anooña. Kriisi iboode pa gabua eta imin gabgab mako. Iboode pa Maaron maata yaryaare Avuvu. Ve iboode ila maet babañazi imin Maaron igham pa tutuun̄ to Mose ne mako. I iboode ila tamtamon lolozi. *

⁴ Ila Maaron maata, yei nighur ila ariiaan̄ nighe saveeñ tane, ene onoon. Pasaa, Kriisi ileep tomani ghei pa uraat tsiei. ⁵ Eemon yei irau nipait taumai mako. Pasaa, irau nigham uraat tauvene ila tau-mai tapirimai mako. Maaron ipapalot ghei, tauta nirao. *

⁶ Tauvene Maaron tauu igham ghei nirao pa uraat tooni. Tauta nimin besooña pa eez paaghu to i yesña tamtamon tooni tivalupu zi timin eemon. Eez tane, ene eez to taghoniin̄ tutuun̄ tau tiboode na mako. Ene eez to Maaron Avuvu tau itortoor ghiit tamin paaghu. Pasaa, tutuun̄ tau tiboode na, ene igham ghiit tamaat. Ve Maaron Avuvu, i igham ghiit taleep poia ila to Maaron. *

Eez paaghu to Kriisi iliiv eez mun̄gaana to tutuun̄

⁷ Eez tau muun̄ tamtamon tibeesh pa Maaron, ene igham ghiit taleep ila eez to mateegh. *

* **3:2:** 1Kor 9:2 * **3:3:** Igham 24:12; Yer 31:33; Ezek 36:27; 1Kor 3:5+; Hib 8:10 * **3:5:** Yo 15:5; 1Kor 15:10; Pil 2:13 * **3:6:** Yo 6:63; Ro 7:6; Ga 3:10+; Hib 8:6+ * **3:7:** Eez mun̄gaana to tutuun̄, ene vene: Isaav ighe tataghon duduñai tutuun̄ tisov to Maaron, ene pale taleep poia. Ve ighe mako, ene pale aatyavyav to Maaron izaa toit.

Eemon saawe tau Maaron irav tutuun tawe ila maet, ve igham pa yes Israela, ene ilam toman mbonari ve tapiri tiina. Tauta yes Israela irau timarar Mose naagho malau mako. Pasaa, mbonari tawe tiina kat le inġowar matazi. Eemon mbonari tana igheen rigmon, ve isov. *

⁸ Ve eez paaghu tau aazne tabees pa Maaron, ene vene: Maaron Avuvu igham uratoi ghiit ve itoor ghiit tamin paaghu. Tauvene eez tane mbonari ve tapiri tiina kat iliiv eez muġaana. *

⁹ Eez paaghu, i le mbonari ve tapiri tiina kat iliiv eez muġaana. Onoon, eez muġaana ilam toman mbonari ve tapiri tiina. Eemon eez tawe isaav pait tauvene: Iit aat tamaat pa sosor toit. Ve eez paaghu tau aazne tataghoni, ene igham ghiit taduduun ila Maaron maata. *

¹⁰ Onoon, eez muġaana ilam toman mbonari ve tapiri tiina. Eemon isaav ighe taghazon pa eez paaghu ngara, ene aat taghita taghe eez muġaana, le mbonari ve tapiri geeg mako. Pasaa, eez paaghu mbonari, ene tiina kat iliiv eez muġaana.

¹¹ Saawe tau Maaron ivotia eez muġaana to tutuun, ene ilam toman mbonari ve tapiri. Eemon eez tawe irau igheen le alok mako. Pale isov. Ve eez paaghu tane irau isov mako. Pale igheen tauvene taghon taghon gha ila. Tauvene, i le mbonari ve tapiri tiina kat. *

¹² Yei nighur ila ariaan tauvene, tauta niroi mako, ve nasavsaav ghazonja pa tamtamon. *

* **3:7:** Igham 34:1, 28; Hib 12:18 * **3:8:** Ro 7:6; Ga 3:2-5 * **3:9:** Ezek 18:4; Ro 3:21, 8:1+ * **3:11:** Ro 10:4; Hib 7:18, 8:13 * **3:12:** Mbanj 4:13; Ep 6:19; Pil 1:20

¹³ Yei nimin Mose mako. Muuŋ, i iponpoon naagho pa uuli sirivu. Leso yes Israela timarar naagho tau isul na sov. Pasaa, mbonari tawe igheen malau mako. Igheen rig, ve isov. *

¹⁴ Eemon yes Israela ŋgar toozi iyaryaan, tauta tighilaal gabua tawe puughu mako. Ve aazne paam, isaav ighe tiwaat saveeŋ to eez muŋgaana, tighilaal puughu mako. Ene imin uuli sirivu iponpoon matazi soone. Pasaa, Krisi mon ta irau itir uuli sirivu tawe ighau pazi. *

¹⁵ Tauta muuŋ ve ilam aazne, isaav ighe yes Israela tiwaat saveeŋ to Mose, yes tighilaal puughu mako. Ene imin gabua eta iponpoon lolozu ve ŋgar toozi. ¹⁶ Eemon isaav ighe tamtamon eta itoor ŋgar tooni, ve ighur ila to Tiina toit, Krisi pale igham gabua tana ighau pani.

¹⁷ Tiina tau nasavia ne, ene Maaron Avuvu. Isaav ighe i ilepleep tomani ghiit, i aat ipas ghiit ila saghati tapiri. Leso tamin besoonja sorok muul sov. *

¹⁸ Aazne, iit taghazoon pa Maaron. Gabua eta ipoon mataan muul mako. Pasaa, iit tasov taghita Neer Tiina mbonari tomania tapiri ve poia tooni ila to Krisi. I itotoi Neer Tiina naagho pait imin taghita Neer Tiina anunu ila natilonja. Tauvene mataan ilala pani, ve Tiina toit Avuvu itortoor ghiit. Leso tagham naagho, ve anaan tatotoi mbonari tomania tapiri ve poia tooni pa tamtamon. *

* **3:13:** Igham 34:33+ * **3:14:** Ro 11:7, 25; 2Kor 4:4 * **3:17:** Yo 8:32, 36; Ro 8:2, 15; Ga 4:6, 5:1 * **3:18:** Yo 1:14; Ro 8:29; 1Kor 15:49; 2Kor 4:6

4

Maaron igham ghazona tooni isul ila loloon

¹ Maaron lolo isaghatin ghei ve ireu sosor tsiei, ve ighur uraat tane ila nimamai itaghon tauu poia tooni. Tauvene patañani naol tau nibaad zi ne, irau itatan ghei, ve igham ghei nipul uraat tsiei tane mako. *

² Ngar mayaña naol tau tamtamon tighamgham zi imin yonğaañ na, yei nighur murimai pazi wa. Ngar tau yei nighamghamu ne, karom eta igheen ila lolo mako. Ve nivotorai Maaron aliña mako. Nisavia dudunaini. Pasaa, yei niwatagh: Maaron ighita uraat tsiei. Tauta nivovotia saveeñ onoon mon pa tamtamon, ve nisavsaav ghazon pazı. Leso tighilaal ila loloji tıghe yei ezamai pa uraat tane. *

³ Onoon, tamtamon siriv, ene imin gabua eta ipoon loloji ve ngar toozi. Tauta saawe tau nivotia vaaru poia pazi, tigham ngar pani mako. Tamtamon tauvene itaghon eez to tilalez. *

⁴ Vaaru poia isavia Krisi mbonari tomania tapiri ve poia tooni. Ve ipaghazonaini ighe i ñeer tau itotoi katin Maaron naagho pait. Eemon yes tau tıghur ila mako na, tıghılaal ghazona to vaaru poia mako. Pasaa, Sadan tau maaron karom to taan tane, i ipoon ngar toozi wa. *

⁵ Saawe tau nivotia mos, yei nisavsaav pa taumai mako. Nisavsaav pa tamtamon nighe: “Yesu Krisi,

* **4:1:** 1Kor 15:10; 2Kor 3:6; 1Tim 1:12+ * **4:2:** 2Kor 2:17, 5:11;
 1Tes 2:3+ * **4:3:** 1Kor 1:18, 2:14 * **4:4:** Yo 1:14, 12:31, 14:9;
 Ep 2:2; Pil 2:6; Kol 1:15; Hib 1:3

i Tiina toit. Ve yei besoonja tsiam. I tauu imbaan ghei nilam to niuul gham.” *

⁶ Muun geeg, Maaron isaav ighe: “Ghazoonja aat ivot ve isul ila ndoroom loolo!” Maaron tawe mon, tauta igham ghazoonja tooni isul ila yei lolomai paam. Leso nighilaal mbonari tomania tapiri ve poia tooni tau Kriisi itotoia pait. *

Yes mbanjoona timin uur tau tigharaat zi pa taan ve tighur kuaz popoia izila lolozii

⁷ Yei mbanjoona nimin uur tau tigharaat zi pa taan ve tighur kuaz popoia izila lolozii. Yei tamtamon sorok to taan, ve tapirimai imbool. Eemon Maaron ighur ghazoonja tooni ve tapiri izila lolomai, ve ighur uraat tooni ila nimamai. Leso itotoi tapiri ila uraat tsiei. Tapiri tawe, ene tiina le tiina kat. *

⁸ Yei, patañani naol ighamgham ghei. Eemon patañani tane itatan ghei mako. Monmon eez ivoolvool payei. Eemon lolomai isaghat mako. Pasaa, yei niwatagh: Maaron pale igham eez eta ivot payei. *

⁹ Tamtamon tighurghur patañani payei. Eemon Maaron ipul ghei mako. Patañani maata maata itatan ghei nizi. Eemon niburig muul. *

¹⁰ Patañani naol tau monmon nibadbaad zi ne, ene imin nipaak Kriisi pa mateegh tooni. Eemon i ipapalot ghei ve niyooz ariiaan pa badoon patañani. Tauta nipaghazonjaini nighe i ileep maata yaryaare. ¹¹ Yei tamtamon to taan mon,

* **4:5:** Mbanj 2:36; 2Kor 1:24 * **4:6:** Gnp 1:3; Mt 4:16; Yo 8:12; 1Pe 2:9 * **4:7:** 2Kor 3:5, 12:9 * **4:8:** 2Kor 1:8, 7:5 * **4:9:** Ro 8:35+

ve tapirimai imbool. Ve saawe isov tau nileep izi taan, nilepleep ila mbuzaagh maata pasaa, yei nitaghon Yesu. Eemon niyozyoos ariaan pa badoon patanani. Gabuamai tane ipaghazonai Yesu ighe i ileep maata yaryaare. ¹² Tauvene monmon nilepleep ila naal aavo. Eemon niuluul gham to agham lepoogh poia ila to Maaron.

¹³ Maaron aliina tau tiboode na isaav ighe: “Yau naghur ila to Maaron, tauta nasavia.” Yei tauvene paam nighur ila to Maaron, ve nitaghon ghuruun ila tsiei ngara. Tauta nisasavia vaaru poia pa tamtamon. ¹⁴ Pasaa, yei niwatagh: Neer tau ipaburigin Tiina toit Yesu pa mateegh na, murei pale ipaburigin ghei paam, raraate imin igham pa Yesu. Ve i pale igham ghiit tala tayooz ila naagho, ve ipavotvotin ghiit ighe: “Aghita. Ene tamtamon tsiau.” *

¹⁵ Patanani naol tau nibadbaad zi ne, ene to iuul gham. Yei nighe poia to Maaron izazaa to eval tiina, lesolozzi poia pani ve tipait eeza pa tapiri ve poia tooni. *

Paulus ighamgham ngar pa gabua tau tigheen le alok

¹⁶ Tauvene patanani naol tau nibaad zi ne, irau itatan ghei ve igham ghei nipul uraat tsiei ne mako. Onoon, anonamai ighe isaghat. Eemon ene gabua to muuri mon. Ve lolomai, saawe isov Maaron ighamgham uratoi ghei, lesolozzi itoor ghei nimin paaghu. *

* **4:14:** Ro 8:11; 1Kor 6:14; 1Tes 4:14 * **4:15:** 2Kor 1:6; Kol 1:24; 2Tim 2:10 * **4:16:** Is 40:29+; Ep 3:16; Kol 3:10

17 Patanani naol tau nibadbaad zi ne, yei nighita nighe ene gabua tiina mako. Ene raurauai mon. Ve malau mako pale isov. Eemon patanani naol tane pale iuul ghei, leso ezamai tiina izi nugh sambam, ve nileep tomania Maaron ila mbonari tiina loolo le alok. Gabua poia tau pale ivot payei ne, ene iliiv kat pa patanani tsiei ta naol ne. *

18 Tauvene gabua tau taghit zi pa mataan ne, yei matamai ila pazi mako. Matamai ilala pa gabua tau irau taghit zi mako ve taloon varuzi mon. Pasaa, gabua tau taghit zi pa mataan ne, pale tigheen rig ve tisov. Ve gabua tau aazne iit irau taghit zi mako, ene pale tigheen le alok. *

5

Paulus ipasawal ighe ηeez o igham anoonja paaghu to nugh sambam

1 Yei nighita anonjama to taan tane, ene imin dur sorok to anunumai ileep ilonj ila. Ve yei niwatagh: Isaav ighe tireu dur tane, Maaron pale igham lemai ruum tauu tau igheen izi sambam. Ruum tawe, tamtamon tigharaata pa nimazi mako. Maaron tauu igharaata. Ve ruum tana pale igheen le alok. *

2-3 Tauvene aazne, yei nipasawal ve nitanj nighe: “Oyai, ηeez o nileep ila niamai paaghu tawe?” Niamai tawe, ene anonjama paaghu to sambam. Saawe tau nilonj nila, ene imin anunumai inonogh ghi pa nonoghiina paaghu. Leso nileep tinimai ηginaanja sov. *

* 4:17: Ro 8:17+; 1Pe 1:6+

* 4:18: Ro 8:24; 2Kor 5:7; Hib 11:1

* 5:1: 2Kor 4:7

* 5:2-3: Ro 8:23

⁴ Saawe tau nilepleep ilonj ila dur tsiei to taan tane, lolomai ipatanjan ve nitantjan pa lepoogh to nugh sambam. Eemon lolomai pa nipul anonjamaï to taan tane mako. Nighe anonjamaï to taan ighengheen tauvene, le malmalimai nilonj nila anonjamaï paaghu to sambam tau pale igheen le alok. Leso anonjamaï to sambam iyol anonjamaï to taan tane, imin tanonogh ghiit pa nonoghiinja paaghu. * *

⁵ Maaron ighur ghiit to tagham lepoogh tauvene. Ve igham tauu Avuvu pait imin puughu pa gabua naol tau murei pale igham pait. *

⁶ Tauta saawe isov, yei niroi mako, ve niyooz ari-aan. Onoon saawe tau nileep tomania anonjamaï to taan, nileep soghan pa Tiina toit. Eemon yei niwatagh: Murei pale nila nileep tomania. *

⁷ Tauvene aazne, taghit katin gabua eta pa mataan soone. Lepoogh toit to taan, ene tataghon eez to ghuruunj ila. *

⁸ Nayol alinjag muul. Yeï niroi mako ve niyooz ari-aan. Ve lolomai nighe le nipul anonjamaï to taan tane, ve nila nileep tomania Tiina toit Yesu izi sambam. Pasaa, ene gabua poia kat iliiv lepoogh tsiei to taan. *

⁹ Tauta isaav ighe nileep soghan pa Tiina toit, ma nileep tomania izi nugh tooni, ene yei nizuari ghei

* **5:4:** Saveenj ziiri tane ngara tauvene: Paulus loolo pa imaat, ve anunu mon ila nugh sambam mako. I ighe Krisi rekia imuul ilam. Leso imaat sov. Igham anoonja paaghu ve malmali ila nugh sambam. * **5:4:** Ro 8:11; 1Kor 15:53+ * **5:5:** 2Kor 1:22; Ep 1:13+ * **5:6:** Hib 11:13+ * **5:7:** 1Kor 13:12; 2Kor 4:18; Hib 11:1 * **5:8:** Pil 1:23

pa ghamuunŋ ngar tau i loolo pani. *

¹⁰ Pa murei, iit tasov aat tayooz ila Krisi naagho. Leso igabiiz ghiit, ve ighur atuya pa iit enjaeŋa itaghon ngar tau taghamu izi taan na. Ngar popoia, ve ngar sasaghati paam. *

Iit leen uraat to tauul tamtamon, lesa yesŋa Maaron tivalupu zi timin eemon

¹¹ Tauvene yei niroi pa Njeer Tiina. Tauta nizuari ghei nighe le nigham tamtamon titoor ngar toozi ila pani. Lolomai tomania ngar tsiei, ene igheen ghazonŋa ila Maaron maata. Ve nighe yam paam aghazonŋ payei, ve aghilaal ila lolomim aghe yei nibesbees pa Maaron toman lolomai. *

¹² Yam agham ngar pa saveeŋ tsiei tane mindai? Aghe nipait taumai muul, lesa aghur ila aghe yei ezamai pa uraat tsiei? Mako. Yei nisavia saveeŋ tane, lesa apakur ghei pa uraat tau nighamu ne, ve irau ayol saveeŋ to zeran siriv tau tileep tomani gham na. Zeran tana, tighamgham ngar pa tamtamon ezazi ve tipakur zi pa gabua to uliin mon. Ve gabua to loloon, yes tigham ngar pani mako. *

¹³ Tamtamon siriv tighit ghei tigde ngar tsiei ivaghamgham imin boraunŋa. Ve siriv tigde ngar tsiei iduduunŋ. Ene poia. Tauzi gha tisavsav! Eemon uraat tsiei tane, nighamghamu to nipakur Maaron eeza, ve niuul gham. *

¹⁴ Ngar to Krisi tau loolo igheen toit kat na, ene ighamgham pooz payei ve ipapaburigin ghei pa

* **5:9:** Kol 1:10; 1Tes 4:1 * **5:10:** Mt 25:31+; Mbanŋ 17:31; Ro 2:16; Syg 20:12 * **5:11:** Mbo 139:1+; Hib 10:31; Jud 23 * **5:12:** 2Kor 1:14+ * **5:13:** 1Kor 1:18-25

ghamuun uraat tooni. Pasaa, yei nighur ila nighe ñeer eemon tawe ta igham tamtamon tisov niazi, ve imaat pa sosor toozi. Tauta yes tau tipaako pa mateegh tooni na, tisov tipul lepoogh toozi munğaana wa. *

¹⁵ Krisi imaat pa tamtamon tisov, leso yes tau tigham lepoogh paaghu ila tooni na, tileep titaghon tauzi ñgar toozi muul sov, ve tileep titaghon ñgar tau i loolo pani. Pasaa, i imaat pa sosor toozi, ve iburig pa mateegh, leso iuul zi. *

¹⁶ Tauvene aazne, yei nigabiiz tamtamon eta itaghon ñgar to taan muul mako. Onoon, muun yei nigabiiz Krisi itaghon taan ñgara. Eemon aazne, nigham ñgar tauvene pani muul mako. ¹⁷ Isaav ighe tamtamon eta imin Krisi le, ve ileep ila tooni, ene Maaron igham gabua paaghu ivot. Ñgar munğaana to tamtamon tana, ene isov, ve i igham lepoogh paaghu. *

¹⁸ Gabua isov tana ivot ila to Maaron. Aghita. Muun, koi isap itiña Maaron sosoon. Eemon ila uraat to Krisi, aazne itiña Maaron tavalupu ghiit tamin eemon wa. Ve i ighur uraat ila nimamai ighe niuul tamtamon, leso yesña Maaron tivalupu zi timin eemon. *

¹⁹ Muun, koi isap iit tamtamon ve Maaron sosoon. Pasaa, tamamalaan pa tutuun tooni. Eemon ila uraat to Krisi, Maaron ireu sosor toit, ve ipasov koi tawe. Tauta aazne, maata kisin sosor toit muul mako, ve itiña tavalupu ghiit tamin eemon wa.

* **5:14:** Ro 5:15, 6:11+; 1Tim 2:6 * **5:15:** Ro 14:7+; Ga 2:20; 1Pe 4:2 * **5:17:** Yo 3:3-7; Ro 6:4; Ga 6:15; Syg 21:4+ * **5:18:** Ro 5:10; Kol 1:20; 1Yo 2:2

Ve i ighur saveeņ tooni ilam tsiei, lesu nivotia pa tamtamon, ve tiwatagh eez to yesņa Maaron tivalupu zi timin eemon. *

²⁰ Tauvene yei nigham Krisi naagho, ve Maaron ivovotia aliņa payam ila avomai. Yei nitaņ rarai gham pa Krisi eeza nighe: “Atoor ngar tsiam ila pa Maaron. Leso yamņa avalupu gham amin eemon.” ²¹ Aghita. Krisi, i le sosor eta mako. Eemon Maaron ighur sosor toit izaa tooni ve imaat imin watoonrau to ireua. Leso iit tau tapaak Krisi ne, tamin tamtamon dudunazi ila Maaron maata. *

6

¹ Yeņa Maaron niluplup ghei pa uraat tooni. Tauvene nighe nipalot gham tauvene: Poia to Maaron tau izaa tsiam na, aat ipaburigin gham pa taghoniņ Maaron ngar tooni. Leso poia tooni tana ighur anooņa. Ighe mako, ene pale imin kaut sorok. *

² Maaron aliņa isaav tauvene:

“Yau taug naghur saawe to naghām mulin gham ve naghām poghani gham. Ve saawe tana duduņ, naloņ sunuņ tsiam, ve nauul gham.” *

Aloņ. Saawe to Maaron ighām mulin ghiit ve ighām poghani ghiit, tauta aazne tazaa pani wa. *

Lepoogh to besooņa tauu to Krisi

* **5:19:** Mbo 32:1+; Ro 3:23+; Kol 1:19+ * **5:21:** Is 53:6+; Ro 5:19; Ga 3:13; Pil 3:9; 1Yo 3:5 * **6:1:** 2Kor 1:24, 5:20; Hib 12:15
* **6:2:** Is 49:8 * **6:2:** Lu 4:18+; Hib 3:13

³ Besoonj tsiei tau nighamghamu pa Krisi ne, yei nighe nitaghon ngar tau iduduunj kat ila tamtamon matazi. Pa ighe nigham sosor eta, ve tamtamon tirere ghei, ene pale sosor tsiei tana ipoon zi ve tighur ila to Krisi mako. *

⁴ Ngar tsiei isov, ene itotoi ighe yei besoonja tauu to Maaron. Pasaa, pataņani maata maata ighamgham ghei, eemon niyooz ariiaan pa badoonj zi. Monmon pataņani izazaa tsiei, ve saawe siriv, nighita nighe lemai eez muul mako. *

⁵ Tamtamon tiloslos ghei, ve tighurghur ghei nilon nila ruum to yavyavuunj, ve nighamgham saghat ila malmal. Yei nirav taumai pa uraat to Krisi le tapirimai isov kat. Ve saawe naol, nighengheen poi mako, ve pitooltool ghei. * *

⁶ Yei nigham ngar tau ingalaan mon ila Maaron maata, ve nighazonj pa ngar tooni, ve nighamgham poghania tamtamon. Ve isaav ighe tigham saghatin ghei, ene niyai ghei ve nibaado mon. Avuvu Patabuyaanj ilepleep tomani ghei, ve nighur lolomai pa tamtamon kat. *

⁷ Yei nisavsavia saveen onoon mon, ve Maaron tapiri ipapalot ghei. Gabua tsiei to malmal, ene ngar tau iduduunj ila Maaron maata. Ngar tane imin iiz tau nipaparav pani, ve imin sigheu tau niponpoon taumai pani. *

* **6:3:** Ro 14:13; 1Kor 8:13, 10:32 * **6:4:** 2Kor 4:9+ * **6:5:** Eez ite to tator ziiri tane, ene vene: "Saawe naol, yei nighengheen poi mako. Nimamaat ve ningun taumai pa ghaniin aniin, lesa matamai ingal sunuunj." * **6:5:** Mbanj 16:23; 2Kor 11:23+ * **6:6:** Ro 12:9; 2Kor 4:2; Ga 5:22; Kol 3:12; 1Tim 4:12 * **6:7:** 1Kor 2:4; 2Kor 10:4

⁸ Saawe tau nigham uraat to Maaron, tamtamon siriv tipait ezamai, ve siriv tivelegh ghei tighe yei tamtamon sorok. Tamtamon siriv tipait varumai, ve siriv tivaghamunia ezamai. Tamtamon siriv tighit ghei tighe yei besoonja tauu to Maaron, ve siriv tighe yei nigham karom ve nipaghau tamtamon pa eez to Maaron. ⁹ Tamtamon siriv tighazoon payei, ve siriv tikankaan payei. Saawe siriv, nigham njar nighe paita nimaat. Eemon nimaat mako. Patanjani siriv tau tivot payei, ene to ipaduduun ghei. Eemon irav ghei nimaat mako. *

¹⁰ Onoon, patanjani naol tau nibadbaad zi, ene igham ghei lolomai ipatanjan. Eemon Maaron igham ghei lolomai poia irau saawe. Ye nileep imin mbolaanja. Eemon niuluul eval tiina le tirau kat pa ghamuun gabua popoia ila to Maaron. Ye lem ai gabua eta mako. Eemon nirao pa gabua naol isov. *

Paulus ivotia loolo pa yes Korin

¹¹⁻¹² O yam Korin, yei lolomai igheen tsiam kat, tauta nisavia saveen naol tane payam. Leso awatagh katin lolomai. Eemon nighita nighe yam aponpoon lolomim payei soone. ¹³ Yau nasaav payam imin natugnja yam: Apoon lolomim payei muul sov. Aghur lolomim payei, imin yei nighur lolomai payam. *

Taghur muriin pa njar sasaghati

¹⁴ Aloonj. Yes tau tighur ila to Krisi mako na, yam apaak zi sov. Pa njar toozi imin yam mako.

* **6:9:** Mbo 118:18; 2Kor 4:9+ * **6:10:** 2Kor 7:4, 8:9; Pil 2:17

* **6:13:** 1Kor 4:14

Yes tau titaghon n̄gar duduun̄a ve yes tau timalaan̄ pa Maaron tutuun̄ tooni na, pale tilup zi pa uraat mindai? Ghazon̄a ve ndoroom irau tilup zi? Mako. *

15 Ma Krisi yesuru Sadan †

tigham n̄gar raraate? Isaav ighe tamtamon ee ighur ila to Krisi, ve ite ighur ila mako, saa gabua irau ilup yesuru? Mako. *

16 Yam awatagh: Iit tamin Maaron maata yaryaare rumei tooni. Mindai, irau rumei tooni ipaak maaron karom̄a rumei toozi? Mako. Saveen̄a, Maaron isavia pataghaan̄ wa. Ighe:

“Yau pale naleep tomani zi, ve nalaghlagh ila sosozi.

Ve yau pale namin Maaron toozi, ve yes timin tamtamon tsiau.” *

17 Tauta Maaron isaav muul ighe:

“Apul zeran sasaghati tana tileep, ve ala aleep soghan pazi.

Ve gabua tau ighe ingalaan̄ mako, na agharauu sov.

Leso naghām gham toman lolog poia. *

18 Ve yau namin tamamim,

ve yam amin natugn̄a ve natug livan̄a.

Saveen̄ tane, ene Maaron saksaki tauu aliin̄a.”

*

7

1 Yam zeran tsiei, lolomai igheen tsiam kat.

* **6:14:** 1Kor 5:9+; Ep 5:6, 11; 1Yo 1:5+ † **6:15:** Paulus ibood Belial (o Beliar). Belial, ene Sadan eeza ite. * **6:15:** 1Kor 10:20+

* **6:16:** Wkp 26:12; Ezek 37:27; 1Kor 3:16; Syg 21:3 * **6:17:** Wkp 5:2; Is 52:11; Syg 18:4 * **6:18:** Ro 8:14; Syg 21:7

Aghita. Maaron igham leen saveen mbuaan popoia naol tane. Tauvene ngar isov tau ivaghamunia anonaan ma anunuun, ve igham ghiit tasaghat ila Maaron maata na, tapuliir zi tileplez. Ve taroi pa Maaron, ve taghur tauun tamin i le kat, ve tataghon ngar patabuyaan mon imin i tauu. *

Paulus loolo poia kat pasaa, yes Korin titoor ngar toozi wa

² Yam tonvetaz, apoon lolomim payei muul sov. Akaak lolomim payei lak! Pa yei nigham sosor pa tamtamon eta, ma nivaghamunia tamtamon eta, ma nigham karom to niium gabua to tamtamon eta, ene mako. *

³ Saveen tsiiau tane, yau nasavia to nasees matamim mako. Naghe napaduduun gham mon. Yau nasaav payam wa. Lolomai igheen tsiam kat. Tauvene isaav ighe talepleep, ma tamaat, ene gabua eta irau irav motin lupuun toit mako. ⁴ Yau nasaav ghazona payam. Lolog ruru payam mako. Yau naghit gham naghe yam arao kat. Tauta agham ghau tintinig. Onoon, patajani naol ighamgham ghei. Eemon ngar tau yam aghamghamu na, ene ipalot ghau, ve igham ghau lolog poia le poia kat.

⁵ Saawe tau nila nivot taan sirivu to Masedonia, yei lemai sooso eta to mariaon mako. Pasaa, patajani maata maata inarui ghei. Yenja tamtamon nivavazorai ghei. Ve nigham ngar naol ila lolomai ve roin tiina igham ghei. *

* **7:1:** 1Tes 4:7; Hib 10:22; 1Pe 1:15; 1Yo 3:3 * **7:2:** Mbanj 20:33;
2Kor 6:12, 12:17 * **7:5:** Mbanj 20:1

⁶ Eemon Maaron toit, i Njeer to palotiin yes tau pataņani itatan zi na. Tauta igham Titus ilam peria tsiei izi Masedonia, leso ipalot ghei, ve irav atemai.
*

⁷ Ve tane mon mako. Gabua ite tau ipalot ghei, ene vene: Saawe tau Titus ilam, i ipaesia varumim payei ighe saawe tau ilat peria tsiam, yam apaloti ve arav aate. Ve ipaes payei ighe lolomim ipataņan kat pa pataņani tau muun ivot ila sosoon, ve apasawal aghe le aghit ghau muul, ve ngar tsiam iyaryaan kat aghe apaak ghau pa ngar tsiau. Saveen tooni tawe igham ghau lolog poia le poia kat.

⁸ Yau nawatagh: Rau tau naboode payam na, aat igham gham lolomim isaghat. Eemon lolog ipataņan pa gabua tawe mako. Onoon, muun lolog ipataņan pani. Ve aazne mako. Pasaa, naghita naghe lolomim ipataņan rigmon, ve isov. *

⁹ Tauta aazne lolog poia. Eemon lolog poia pa lolomim tau isaghat na mako. Yau lolog poia pasaa, saawe tau lolomim isaghat, yam atoor ngar tsiam. Ngar to loloon ipataņan pa sosor toit ve tator ngar toit, ene itaghon Maaron ngar tooni. Tauta rau tsiei tana ivaghamun gham mako.

¹⁰ Isaav ighe loloon ipataņan itaghon Maaron ngar tooni, ene igham ghiit tator loloon, leso Maaron igham mulin ghiit. Ngar tauvene, sei irau loolo ipataņan pani? Mako. Eemon isaav ighe loloon ipataņan imin yes tau titaghon ngar to taan, ene aat igherev ghiit pa mateegh. *

¹¹ Aghita. Saawe tau agham rau tsiau ve lolomim

* **7:6:** 2Kor 1:3, 2:13 * **7:8:** 2Kor 2:4 * **7:10:** Mbo 38:18; Lu 18:13+

isaghat itaghon Maaron ngar tooni, yam irau asañan mako. Reikia ve agharaat taumim. Pasaa, ngar tsiam iyaryaan aghe apaghazonai taumim, leso yau nawatagh: Patañani tau ivot na, yam aleep ila loolo mako. Yam aroi pa Maaron, ve aghe ataghon dudunai ngar tooni. Tauta aghur atuya pa neer tau igham sosor na. Ve aazne, apasawal aghe le aghit ghau muul. Ngar tsiam isov tana itotoi ighe patañani tau ivot na, yam sosor tsiam mako.

¹² Saawe tau nabood rau tana payam, yau nagham ngar tiina pa neer tau igham sosor tana, ma tamtamon tau i igham sosor pani na mako. * Yau naghe yam apaghazonai taumim ila Maaron maata aghe yam lolomim igheen tsiei ve apaak ghei pa ngar tsiei. Tauta nabood rau tana.

¹³ Tauvene ngar tau yam aghamu na, ene ipalot ghei, ve irav atemai. Ve gabua ite. Titus ipaes payei ighe i loolo poia kat pasaa, saawe tau i ilat, yam asov aghamu toman lolomim poia. Tauta aate izi, ve igham ngar naol muul mako. Ngar tsiam tana ipalot ghei paam, ve igham lolomai poia kat. ¹⁴ Muun, yau nasavia varumim pa Titus ve napait gham pa ngar tsiam. Saveen tsiu tawe igham ghau mayag mako. Pasaa, aliñamai tau nisavia pani imin paitoon gham na, ene onoon. I tauu ighita wa. Tauvene saveen tsiei tawe onoon, raraate imin saveen isov tau yei nisasavia payam na paam, ene onoon mon. ¹⁵ Titus paam loolo igheen tsiam kat. Pasaa, maata ingalngal saawe tau i ilat tsiam. Yam atandagh pani ve aghamu

* **7:12:** Mos ziiri tane, Paulus isavia neer ee tau muun izoor aliñ ve igham sosor. Eemon i loolo pa watoon neer tawe eeza ivot ighazon mako.

toman lolomim poia, ve yam asov aloonj aliinja. Pasaa, aroi pa Maaron ve aghe ataghon ngar tooni.
*

¹⁶Tauvene aazne, yau lolog poia le poia kat. Pasaa, yau naghur ila ariaanj naghe yam aat ataghon katin Maaron ngar tooni.

8

Paulus ipalot yes Korin ighe tiuul tamtamon to Krisi tau tileep izi Yudea ve mbolaan igham zi

¹Yam tonvetaz, yei nighe yam awatagh: Poia to Maaron ipaburigin lupuunj to Krisi tau tileep izi taan sirivu to Masedonia le tigham ngar poia kat.
*

²Onoon, yes tileep ila patanjani tiina loolo, ve mbolaan igham zi le tileep saghat kat. Eemon tigoog maet tiina kat to tiuul tamtamon to Krisi tau tileep saghat izi Yerusalem. Ngar toozi tawe, tighamu toman lolozu poia kat. Pasaa, yes matazi reinj gabua. *

³Taug naghita ngar toozi wa. Tauvene naghe napaes payam: Maet tau tigooga pa uleenj na, tiina kat. Tighur irau to yes tighuru, ve tighur siriv paam izala paavo. Tauzi lolozu tigde tigham tauvene. ⁴Pasaa, ngar toozi iyaryaanj kat tigde yes paam tighur nimazi pa uleenj Maaron tamtamon tooni tau mbolaan igham zi na. Tauta tinoknok ghasoniinj ghei le niyok pazi. *

⁵Yei nighe pa tigham ngar tane mon. Eemon mako. Imin maata, yes tighur tauzi toman lolozu isov ila

* **7:15:** 2Kor 2:9 * **8:1:** Ro 15:26+ * **8:2:** Mk 12:44; Ro 12:8

* **8:4:** Mbanj 11:29; 2Kor 9:1+

pa Tiina toit, ve tighur tauzi payei paam, itaghon Maaron loolo.

⁶ Uraat to uleen tane, poia to Maaron imin puughu pani, ve Titus ipaburiginini ila sosomim wa. Tauta yei nisaav pani to ipalot gham pani le apasovu kat. ⁷ Maaron Avuvu irei tapiri tomania uraat ve ngar maata maata payam le arau kat. Yam aghur ila ariiaan, avovotia Maaron aliija pa tamtamon, aghazoon pa ngar tooni, ve tinimim ibees pa uraat tooni. Ve uraat tau nighamu ila sosomim na, ene ipaburigin gham, tauta lolomim pa Maaron ve tamtamon paam. Uraat to uleen tamtamon, ene ngar ite tau poia to Maaron ipapaburigin ghiit pani. Tauvene yam arao paam, ve matamim reirei, o poia. *

⁸ Alijag tane, nasavia imin tutuun payam mako. Yau naghe natoov gham, lesu naghita: Yam aghur lolomim pa Maaron ve tamtamon kat, imin yes siriv tau tinizi ibees pa uraat tane, ma mako?

⁹ Poia to Tiina toit Yesu Krisi, yam awataghi wa. Muun, i irao pa gabua ta naol ne. Eemon ipuliir gabua tooni tawe tisov tizi tigheen, ve izilam taan gha ileep imin neer mbolaanja, lesu iuul gham, ve igham gham arau kat pa gabua to Maaron. *

¹⁰ Tauvene yau naghita naghe: Yam apasov uraat tane le isov kat, o poia. Ndaman tau ila wa, lolomim ipazaagh gham pa uraat to uleen tane, ve apaburiginini imin maata. ¹¹ Uraat to uleen tau lolomim ipaburigin gham pani na, yam irau tinimim ibees pani, ve agham uratoini le apasovu kat. Yam aat aghur irau to aghuru. Isaav ighe

* **8:7:** 1Kor 1:5, 16:1+ * **8:9:** Mt 8:20; Pil 2:6+

lemim maet tiina, aghur tiina. Ighe lemim tiina mako, aghur n̄giira. ¹² Pa ighe iit leen gabua eta, ve loloon taghe tagham pa Maaron, i pale loolo poia pani. Ve ighe leen gabua mako, ene poia. Maaron irau ighur maata pait to tagham gabua tauvene pani ne mako. *

¹³ Ngar tsiam ikau pa saveen̄ tsiau tane sov. Yau naghe yam auul tamtamon siriv tileep poia, ve taumim aleep saghat ne mako. Naghe yam asov aleep raraate. ¹⁴ Aazne, yam arao pa gabua naol. Tauvene yam irau auul zi pa mbolaan̄ toozi. Ve murei, isaav ighe yes tirao pa gabua siriv tau yam ambool pani, ene pale anazi tiuul gham. Leso yam asov aleep raraate. *

¹⁵ Yam irau ataghon n̄gar tau muun̄ ivot pa yes Israela, indeen̄ saawe tau tiyau aniin̄ manna na. Saveen̄a tiboode pataghaan̄ tauvene:

“Yes tau tiyau tiina na, tighan le tipasovu kat. Avozi muuri rigta izi mako. Ve yes tau tiyau n̄giira mon na, tauvene paam. Timbool mako. Tighan le apozi isun̄.” *

Paulus imbaan̄ zeran tol to tiuul yes Korin

¹⁶ Yau napait Maaron toman lolog poia. Pasaa, i igham Titus ighur loolo payam kat. Tauta i ighe iuul gham, raraate imin̄ yei nighe niuul gham.

¹⁷ Saawe tau yei nighasoni to ilat ighit gham, i iyok pa alin̄amai. Ve tauu loolo ighe ilat ighit gham paam. Pasaa, i ighur loolo payam kat ve ighe iuul gham. ¹⁸ Ve yei aat nimbaan̄ ton̄vetaz toit ite lesu yesuru Titus tilat. N̄eer tane, lupun̄ to Maaron

* **8:12:** Mk 12:43; 2Kor 9:7; 1Pe 4:10

* **8:14:** 2Kor 9:12+

* **8:15:** Igham 16:18

tisov tipapait eeza pa uraat tooni to votiaan vaaru poia. ¹⁹ Ve tane mon mako. Lupuun to Krisi tighuru, lesu yeŋa nilaagh pa uraat tane. Uraat to uleen tane, poia to Maaron ipaburigini ila sosoon. Ve yei nighe nighamu to nipait Tiina toit eeza, ve nipaghazonai taumai nighe yei tinimai ibees pa uraat to uleen Maaron tamtamon tooni.

²⁰⁻²¹ Yei niwatagh: Tamtamon pale tighur maet tiina pa uleen tonvetaz toit tau mbolaan igham zi na. Tauvene yei nighe ninjin poghania maet tau nigham zi ne, ve nigham ngar tau iduduun mon ila Tiina toit maata, ve tamtamon matazi paam. Leso tamtamon tiyau avozi payei sov. *

²² Ve yei aat nimbaan tonvetaz toit ite paam ilat tomania zeran ru tawe, lesu yes tol tilat payam. Neer tane, yei nighur uraat maata maata ila niima, ve nighita nighe tiini ibesbees pa uraat to Maaron. I ighur ilat tsiam ariaan ighe yam aghur lolomim pa uraat tane kat, tauta ighe iuul gham.

²³ Tauvene Titus, yam awataghi wa. Pasaa, yeiru niluplup ghei pa uraat tau nighamghamu ila sosomim. Ve tonvetaz toit ru tau nasavi zi payam na, yesuru tigham lupuun to Krisi naagho ve tilat. Uraat toozi tomania ngar tau tighamghamu na, ene ipait Krisi eeza, ve ipaghazonai tapiri tomania poia tooni. ²⁴ Tauvene isaav ighe yes tol tilat peria tsiam, na agham zi ve atotoi ngar poia pazi. Leso tiwatagh tighe yam lolomim pazi, ve lupuun tisov to Krisi tiwatagh tighe: Saveen tau muun nisavia to nipait varumim na, ene onoon.

* **8:20-21:** Ro 12:17+; 2Kor 6:3; 1Pe 2:12

9

Paulus ipalot tamtamon to Akaia, lesu yes paam tigoog maet pa yes Yerusalema

¹⁻² Aiyo, yam tau aleep izi taan sirivu to Akaia na, irau nabood saveen malaua payam mako. Pasaa, yau nawatagh: Ngar tsiam iyaryaan aghe auul Maaron tamtamon tooni tau mbolaan igham zi na. Ene imin besoon tsiam ila pa Maaron. Monmon, yau napapait varumim pa zetaanja to Masedonia. Pasaa, ndaman tau ila wa, yam agoog maet ve aghuru gha isaan. Ngar tsiam iyaryaan kat aghe agham uraat to uleen tane, tauta ipaburigin eval tiina to Masedonia paam. ³ Tauvene yei nipait varumim ve nisaav pazi nighe yam agoog maet wa. Puughu tane ta yau naghe nambaan Titus tomania tonvetaz toit ru tawe timuun tilat, lesu tiuul gham pa uraat tane. Mako pale saveen tau nisavia imin paitoon gham na imin kaut sorok. ⁴ Yau naghur ila ariaan naghe yam pale agharaat gabua imin abumim ve isaan. Eemon isaav ighe yena tamtamon siriv to Masedonia nilat, ve tighet gham agharaat gabua soone, ene pale mayag pa alinag tau nasavia to napait gham na, ve yam paam pale mayamim. ⁵ Matag ingal tane, tauta naghe nambaan tonvetaz toit tol tana timuun tilat. Lesu yamna agharaat maet tau agooga itaghon saveen mbuaan tsiam na, ve isaan pataghaan. Maet tana pale itotoi poia to Maaron pa tamtamon tooni. Yau lolog pa natal nazozonook payam ve aghur gabua ne mako. Yau naghe agham gabua tiina toman lolomim.

⁶ Matamim injal: Isaav ighe tamtamon eta ivazogh aniiñ ñgiira, ene pale saawe to taitain, i aat ighita anooña ñgiira mon. Ve tamtamon tau ighe ivazogh aniiñ katini, ene pale ighita anooña katini. *

⁷ Tauvene maet piiz tau tamtamon enaenja tighuru itaghon tauzi lolozi, ene poia. Eemon isaav ighe yam anguruut gabua tsiam, ve tizozonook payam ila ila le aghuru, ene poia mako. Pasaa, Maaron lolo pa yes tau tireirei gabua toozi toman lolozi poia. ⁸ Maaron, i irau ighur poia tooni tiina izaa tsiam ila eez maata maata. Leso yam arau kat pa gabua naol isov irau saawe, ve irau agham uraat popoia ta naol ne. *

⁹ Saveenja tiboode pataghaan wa. Ighe:

“Neer poia, i ireirei gabua tooni pa yes mbolaanja.

Tamtamon tauvene, ñgar tooni duduunja pale igheen ariaan taghon taghon gha ila.” *

¹⁰ Yes tau tivavazogh aniiñ na, Maaron igham lezi aniiñ uuve. Ve i igham aniiñ pa iit tasov. I pale igham gabua tsiam ivot katini, lesa arei tiina ila pa yes mbolaanja. Ñgar tauvene iduduun ja i maata, ve ighur anooña popoia maata maata. ¹¹ Tauvene Maaron pale igham gham arau kat pa gabua naol isov. Leso yam irau agham uleen pa tamtamon irau saawe. Ve saawe tau yei nigham gabua tsiam ila peria to yes tau mbolaan igham zi na, yes pale lolozi poia pa Maaron, ve tipakuru pa uleen tau yam agham pazi na.

¹² Uraat tane, yam aghamu imin besoon tsiam

* **9:6:** Lu 6:38; Ga 6:7+ * **9:8:** Lp 28:27; Pil 4:19 * **9:9:** Mbo 112:9

ila pa Maaron. Uleenj tsiam pale ipasov mbolaan to tamtamon tooni. Ve tane mon mako. Pale igham eval tiina lolozu poia pa Maaron, ve tipaiti kat pa poia tooni paam. *

¹³ Ngar tsiam tau aghe arei gabua tsiam ve ayambaar uleenj ila pa yes mbolaanja na, ene itotoi gham ighe yam aghur ila vaaru poia to Krisi, ve ataghon aliija. Tauvene tamtamon tau tigham uleenj ilat tsiam na, pale tipait Maaron eeza pa tapiri ve poia tooni. ¹⁴ Ve lolozu igheen tsiam, ve matazi injal gham ila sunuunj toozi. Pasaa, tighita poia tiina to Maaron igheen tsiam.

¹⁵ Iit loloon poia pa Maaron ve tapakuru! Pasaa, i igham leen gabua tau poia le poia kat. Isaav ighe tasavia gabua tawe, ene pale tasavia mindai? Pa saveenj eta irao mako. *

10

Paulus iyol saveenj ngaliinj to tamtamon siriv

¹ Tamtamon siriv tingalngal saveenj payau tighe saawe tau naleep tomani gham, yau naroiroi ve nasasavia saveenj popoia mon payam. Ve ighe naleep soghan payam, ene napakur taug ve avog iyaryaanj payam. Tauvene yau Paulus naghe napalot gham pa saveenj siriv. Saveenj tau naghe nasavia, ene nasavia toman ngar marowa ve ngar to natatan taug imin Krisi itaghoni. *

² Yau nawatagh: Zeran siriv tighe yei nitaghon Maaron ngar tooni mako. Tighe nitaghon ngar to tamtamon mon. Zeran tawe aat tiyamaan zi. Pa

* **9:12:** 2Kor 4:15, 8:14 * **9:15:** Yo 3:16; 1Pe 1:8-9 * **10:1:** Mt 11:29; 1Kor 2:3; Pil 2:5+

ighe nilat, ene irau naroi pazi mako. Pale nayaon zi toman saveeņ ariaaņa. Eemon lolog pa naghām nğar tauvene mako. Tauvene nataņ rarai gham naghe agharaat nğar tsiam. *

³ Onoon, aazne yei nileep izi taan. Eemon nipa-parav imin yes tau titaghon taan nğara ne mako.

⁴ Pasaa, zaab to malmal tau yei nipaparav pani, ene to taan mako. Ene zaab tau Maaron igham payei, ve i tauu tapiri igheen ila. Tauta ruum arianaži tau koiamaiņa tiiyonyoon ila lolozi na, yei irau nireu mbirisai zi tizi. *

⁵ Zeran siriv tipapait tauzi pa nğar toozi, ve avozi iyaryaan pa nğar karom naol tau iponpoon eez pa yes tau tighē tiwatagh Maaron na. Zeran tauvene, yei nireureu nğar ve saveeņ karom toozi isov. Ve nitatan nğar toozi sasaghati, ve nigham nğar toozi isov imuul ila pa Krisi. Leso titaghon nğar tooni, ve tileep ila i saamba. *

⁶ Yei nighur matamai ilat tsiam mon. Ighe yam alooņ aliņamai ve ataghon saveeņ tsiei, ene yei aat nighur atuya pa tamtamon tisov tau tizoroor saveeņ na.

⁷ Alooņ. Yam agabiiz gabua paavo mon sov. Agabiiz poghania loolo tooni paam. Isaav ighe tamtamon eta igham nğar ighe i to Krisi, i aat iwatagh ighe yei paam to Krisi, ve Krisi tauu ta ighur ghei pa uraat tooni. *

⁸ Onoon, saveeņ tsiau tane, ene imin napait ezamai pa uraat tau nighamghamu ne. Eemon mayag mako. Pasaa, yei ezamai pa uraat tane. Tiina

* **10:2:** 1Kor 4:21 * **10:4:** 2Kor 6:7; Ep 6:13+; 1Tim 1:18

* **10:5:** 1Kor 1:19 * **10:7:** Yo 7:24; 2Kor 11:23; 1Yo 4:6

toit ighur ghei pa uraat tane to nivaghamun gham mako. I ighe nipalot gham. *

⁹ Tauvene agham ngar aghe rau tau nabood zi payam na, ene to naparoi gham sov.

¹⁰ Tamtamon siriv tisavi ghau tighe: “Saveen tau i iboode ila rau na, ariaaᅇa ve toman tapiri. Eemon isaav ighe tauu ilam peria, ene taghita taghe i le tapiri mako, ve ivaghamgham pa savsaveen. Saveen tooni anooᅇa mako.” ¹¹ Zeran tana irau tigham ngar poi. Pa saveen tau nileep malau ve niboode payam na, isaav ighe nilat gha itiᅇa taleep, ene pale nitaghon saveen tana ngara. *

Paulus ighe i le eeza pa ghamuun uraat izi Korin

¹² Yei nimin zeran siriv mako. Yes tiliiv ghei kat. Pasaa, ngar tau tighamghamu na, yei irau nighamu mako. Yei mayamai pa paitoon taumai ezamai. Eemon yes mayazi pa ghamuun ngar tauvene mako. Tighe yes tirao kat. Pasaa, saawe tau tigabiiz tauzi, yes tigham ngar pa Maaron aliᅇa mako. Tigabiiz tauzi tomania to zetazᅇa ngar toozi. Zeran tauvene, lezi ngar mako. *

¹³ Yei irau nipakur ghei sorok imin zeran tana mako. Isaav ighe nipakur ghei, ene nipakur ghei pa uraat tau nighamu izi nugh tau Maaron ighuru payei na. Nugh tana, yam Korin aleep ila paam. Ve nugh tau ighe lemai ezamai to nigham uraat pani mako, ene irau nimalaan ve nila nigham ta sewe mako. *

* **10:8:** 2Kor 13:10 * **10:11:** 2Kor 13:2 * **10:12:** Lu 18:9-14

* **10:13:** Ro 12:3, 15:18

¹⁴ Nugh tau Maaron ighuru payei to nigham uratoini na, yei nimalaan pani mako. Yam Korin aleep ilonj ila paam. Ve yei ta nilat ve nivotia vaaru poia to Krisi payam imin maata. Tauvene yei ezamai pa ghamuunj uraat ila yam sosomim. *

¹⁵ Yei irau nipakur ghei pa tamtamon siriv uraat toozi mako. Uraat tau taumai nighamu izi nugh tau Maaron ighuru payei to nigham uratoini, o nipakur ghei pani. Uraat tau nighamghamu ila sosomim to nipalot ghuruunj ila tsiam, yei nighe ivot imin tiina. ¹⁶ Leso imin eez payei to nivotia vaaru poia izi nugh siriv tau tighengheen soone. Yam Korin ve taghon gha ila. Pa lolomai pa nipakur ghei pa uraat tau tamtamon ite ighamu ne mako. Tauvene nighe le nila nugh tau tamtamon tigham uratoi zi soone, o poia. *

¹⁷ Maaron aliinja isaav ighe:

“Tamtamon tau loolo pa ngar to pakuruun, na i aat ipakur Njeer Tiina.” *

¹⁸ Isaav ighe tamtamon eta ipait tauu, ene takakaan: Maaron loolo poia pani, ma mako? Ve ighe Maaron tauu ipait tamtamon eta, ene tawatagh taghe i loolo poia pani. *

11

Paulus iveveen yes Korin pa mbanjoonja karomnja

¹ Yau naghe naghama ngar to boraunja rig. Mindai, irau ayok payau? ² Aghita. Yau nasiigh gham pa Krisi wa. Ve ngar tsiau iyaryaanj naghe le

* **10:14:** 1Kor 3:5 * **10:16:** Ro 15:20 * **10:17:** Yer 9:23+;
1Kor 1:31 * **10:18:** Ro 2:29; 1Kor 4:4+

ngar tsiam isov ingalaan mon, ve naghur gham ala tooni, imin livaa mbiu tau tighuru ila to tamoot. Pasaa, Maaron ngar tooni iyaryaan ighe tamtamon tooni tighur lolozi ve ngar toozi isov ila pani mon. *

³ Aazne, yam ataghon ngar ngalaanja ve aghur lolomim isov inarui Krisi. Eemon naroi pa aat tamtamon siriv tikau ngar tsiam, imin muun moot igham karom pa Eva ve itombaana, mako apul ngar tana. *

⁴ Pasaa, yau nawatagh: Tamtamon siriv tilat tileep tomani gham, ve saveen tau tivovotia pa Yesu na, ene raraate imin saveen tau muun yei nisavia payam na mako. Ve avuvu tau yes tigde yam aghamu, ene raraate imin Maaron Avuvu tau muun aghamu na mako. Ve vaaru poia tau tivovotia payam na paam, ene raraate imin vaaru poia tau yei nisavia payam ve aghur ila na mako. Eemon yam agham zi toman lolomim poia, ve apul zi gha tighamgham uraat toozi tawe, ve aghur ila saveen toozi. *

⁵ Aloonj. Mbanjoonja siriv tau yam aghit zi aghe ezazi tintiina na, yes tiliiv ghau mako. Saa ngar tau yes tighamu, yau naghamu paam. *

⁶ Onoon, yau neer to savsaveen imin yes mako. Eemon ngar to Maaron, yau nambool pani mako. Saawe naol, ngar maata maata tau naghamghamu ne, ipaghazonjai ghau ila matamim ighe yau naghazonj pa Maaron ngar tooni. *

* **11:2:** Ep 5:27; Kol 1:28; Syg 14:4 * **11:3:** Gnp 3:1+; 2Pe 3:17 * **11:4:** Ga 1:6+ * **11:5:** 1Kor 15:10; 2Kor 12:11; Ga 2:6+ * **11:6:** 1Kor 1:17, 2:1, 13; Ep 3:4

⁷ Yam awatagh: Saawe tau navotia vaaru poia to Maaron payam, natatan taug, ve naghams uraat payam sorok. Nayok pa agham leg atuya mako. Yau nataghon eez tauvene to napakur gham. Laak, yam aghita mindai? Yau nasosor? *

⁸ Saawe tana, yau naleep ila lupuuñ siriv to Krisi nimazi. Uleen tau tigham payau na, ene iuluul ghau to naghams uratoi gham. Ngar tane, ene imin yau naum gabua toozi, ve naghams payam.

⁹ Saawe tau itina talepleep ve mbolaan igham ghau, yau naghason gham pa uleen eta mako. Pasaa, tonvetaz siriv to Masedonia tilam, ve tiuul ghau pa saa gabua tau nambool pani na. Ve lolog pa naghams patañani eta payam mako. Tauta nayai ghau, ve naghason gham pa uleen eta mako. Ve aazne ve taghon gha ila paam, pale nataghon ngar raraate mon. *

¹⁰ Aloon. Saveen onoon to Krisi igheen ila lolog ve i tauu ighit ghau ve nasavia saveen tane. Yam tamtamon to Akaia, tsiam eta irau igham ghau napul eez tau nataghoni pa uraat tsiau ne mako. Pa eez tane ta igham ghau tintinig ve napakur ghau pani. ¹¹ Mindai, yam aghe yau lolog payam mako, tauta nataghon eez tane? Maaron iwatagh: Yau lolog igheen tsiam kat. ¹² Tauvene irau nayok payam to auul ghau ne mako. Eez tau nataghoni pa uraat tsiau ne, ene pale ighengheen tauvene. Pa naghe napoon eez pa yes tau tipapait tauzi ezazi tige yes raratezi imin yei.

Ngar tau mbanooña karomña tighamghamu

* **11:7:** 1Kor 9:12+ * **11:9:** 2Kor 12:13; Pil 4:15+; 1Tes 2:9

¹³ Zeran tawe, tigham tauzi timin mbaŋooŋa to Kriŋi. Eemon yes mbaŋooŋa tauu to Kriŋi mako! Tigham karom. *

¹⁴ Ve iit irau tarur pa karom toozi tawe mako. Pasaa, Sadan tauu irau itoor ghi imin aŋela ve itotoi ghazooŋa to Maaron, leso itombaan ghiit. *

¹⁵ Tauvene besooŋa tooni paam, irau tigham tauzi timin zeran tau titaghon ŋgar duduunja. Eemon tarur pazi sov. Murei, Maaron pale ighur atuya iŋarui zi pa ŋgar toozi.

Pataŋani naol tau Paulus ibaad zi, tauta ipagha-zoŋaini ighe i mbaŋooŋa tauu to Kriŋi

¹⁶ Yau nasaav wa. Naghe nasavia saveeŋ rig imin boraunja. Eemon tsiam eta ighit ghau imin borau sov. Ve isaav ighe aghit ghau imin borau, ene poia! Apul ghau ve naghram ŋgar imin yes boraunja, ve napait taug ezag rig. ¹⁷ Yau nawatagh: Saveeŋ tau naghe nasavia to napait taug, ene itaghon ŋgar to Tiina toit mako. Saveeŋ tau naghe nasavia, ene imin saveeŋ to yes boraunja tau lezi ŋgar mako. ¹⁸ Ve tambaanjo. Pasaa, eval tiina tau yamŋa alepleep na, tipapait tauzi ezazi itaghon ŋgar to taan. Tauvene yau paam, anag naghe napait taug. ¹⁹ Aa yam Korin, yam aat ŋgar puughu! Tauta yes tau lezi ŋgar mako na, yam lolomim poia pazi, ve lolomim pa loŋaan saveeŋ to yes boraunja! ²⁰ Ve tane mon mako. Pa ighe tamtamon eta itatan gham ve izoornugh ighe ataghoni pa ŋgar tooni mon, ma ipasovuur gabua tsiam, ma igham gabua tsiam piind ee mon, ma ipapait tauu, ma iposai

* **11:13:** Mt 7:15+; Mbaŋ 20:29+; 2Kor 2:17 * **11:14:** Ga 1:8

gham ve ipamayanin gham, na yam ayok pani mon, ve apuli ighamgham tauvene. ²¹ Zeran tana tiliiv ghei kat! Tigham ghei mayamai. Pasaa, ngar tau tighamghamu na, yei irau nitaghoni mako.

Aiyo, naghe naseen saveen tsiau borau tane. Pasaa, zeran siriv tau tileep tomani gham na mayazi mako ve tipapait tauzi ezazi. Tauvene yau aat nataghon ngar toozi ve napait taug ezag paam!
*

²² Mindai, zeran tana yes Hibrua? Yau paam to Hibu. Ve yes to Israel? Yau paam to Israel. Ve yes tivot ila to Abaram? Yau paam navot ila to Abaram. * *

²³ Ve yes besooja to Krisi? Yau paam, besooja tooni. Eemon yau naliiv zi. Alinag tane, yau nawatagh, ene saveen to borauna. Eemon tambaano! Yau narav taug pa uraat to Krisi le naliiv zi. Saawe naol tilos ghau le nasaghat, ve tighur ghau naloj nala ruum to yavyavuun pai katini. Ve saawe naol, naghe paita namaat. Patanani naol tau nabaad zi ne, ene naliiv zeran tana. *

²⁴ Daaba to yes Yuda tilos ghau pa ravraav pai liim wa. Ve saawe enaenja tau tilos ghau na, tilos

* **11:21:** 2Kor 10:10 * **11:22:** Saveen 'Hibrua' ve 'Israela', pughuzi ite ite. Hibrua, ene Abaram paaghu tooni. Ve saveen 'Israela' ene inarui ghuruun ila toozi. Yes tau Maaron igham zi timin ile, ve titaghon tutuun tooni na tiwaat tauzi tigde yes Israela. Ve nugh nugh tiwaat zi tigde 'Yuda'. * **11:22:** Mban 22:3; Ro 11:1; Pil 3:4+ * **11:23:** 1Kor 4:9+; 2Kor 4:11, 6:4+

ghau pai tamoot ee sanjavul liim ve paan (39). † *

²⁵ Yes Roma tigham toon ve tilos ghau pai tol wa. Ve saawe ee, eval tikor maet ve tirav matin ghau. Pai tol, yau nazaa waan ve niraav nila le waan imbiris ila te paavo. Ve saawe ee, namoghan ila te paavo pa mbon ee, ve mataaz ee. *

²⁶ Saawe naol tau nalaghlaagh, saghatiin maata maata inajarui ghau ve rigmon kanan namaat. Yaa ivot toman tapiri le rigmon kanan izugh ghau gha nalaleg. Monmon umbuuna, ve yes Yuda tau yena nugh eemon, ve yes tau Yuda mako na paam tizuari zi tigde le tivaghamun ghau. Tauvene isaav ighe naleep ila nugh tintiina, ma nalaghlaagh izi nugh nginaana, ma nazaa waan ve naraav ila te paavo, ene patanani ighamgham ghau tauvene. Ve yes tau titoom ve tigham tauzi timin tonvetaz to Krisi na, tighamgham patanani tiina payau paam. *

²⁷ Monmon, yau narav taug pa uraat ve nagheen poi mako. Ve saawe naol naleep saghat, ve murun ghau ve pitool ghau. Leg aniin mako. Ve ngoaan ighamgham ghau pasaa, leg nonoghiina poia eta to nanonogh ghau pani mako. *

²⁸ Patanani naol tawe, to tinig mon. Ve gabua ite ighamgham patanani payau paam. Pasaa, saawe isov, yau naghamgham ngar naol pa lupuun tisov

† **11:24:** Tutuun to Mose isaav tauvene: Isaav ighe tilos tamtamon eta, yes irau tilosi pa tamoot ru (40) ve izi. Irau timalaan pa 40 ve izala mako. Tauvene saawe tau yes Yuda tilos Paulus, tingal maata kat. * **11:24:** Lo 25:3 * **11:25:** Mbanj 14:19, 16:22, 27:41 * **11:26:** Mbanj 9:23, 13:50, 20:3, 23:12+ * **11:27:** Mbanj 20:31; 2Kor 6:5

to Krisi, ve lolog bubu pazi. ²⁹ Isaav ighe tam-tamon eta ghuruun ila tooni iyaryaan mako, ene igham ghau nayamaan naghe tapirig isov. Ve ighe tigherev toit eta gha igham sosor, ene igham ghau ateg yavyav kat.

³⁰ Isaav ighe ngar tsiam iyaryaan aghe napait taug, ene poia. Yau aat nataghon ngar tsiam. Eemon saawe tau napakur ghau, yau aat nasavia gabua siriv tau titotoi tigha yau tapirig imbool. *

³¹ Maaron tau Tiina toit Yesu Krisi Taama na, iit aat tapait eeza irau saawe. Iiwatagh: Saveen tsiau tane, karom mako. Ene onoon mon. *

³² Saawe tau naleep izi nugh tiina Damaskus, gavana tau kinik Aretas ighuru pa nginiin nugh tawe na, ighur zaaba siriv to tingin ataman to nugh, lesa tikis ghau. ³³ Eemon naleep ila nakaral tiina loolo, ve zetagna titugh ghau itaghon sooso to yaghur tau ighaen ila didiin tiina to nugh, ve nazila. Tauta i ikis ghau mako, ve naghau. *

12

Paulus isavia tandaghiin tooni

¹ Onoon, yau naghita naghe ngar to paitoon tauun ezaan, ene iuul ghiit mako. Eemon leg eez ite paam mako pasaa, yam lolomim pa ngar tauvene. Tauta yau aat naseen saveen tsiau, ve nasavia gabua siriv tau Tiina toit Yesu ivotia payau ila tandaghiin. ² Yau nawatagh neer ee to

* **11:30:** 2Kor 12:5, 9+ * **11:31:** Ro 1:9+; 2Kor 1:23 * **11:33:** Mban 9:23+

Krisi. Ndaman sanjavul ve paan tau ila wa, Maaron indae izala pa sambam tau saanja le saanja kat. *
 Ve yau nawatagh mako. Neer tawe tauu izala ve ighita pa maata, ma itandagh mon? Maaron mon ta iwatagh. ³⁻⁴ Tauvene neer tana, Maaron indae izala pa nugh tooni tau paghuuna le paghuuna kat. Ve nayol alinag muul. Nawatagh mako. Neer tana tauu izala ve ighita pa maata, ma itandagh mon? Maaron mon ta iwatagh. Saawe tau ileep ta sewe, i iloon saveen to gabua siriv. Gabua tawe, isaav ighe tatoova to tasavia, ene pale tarao mako. Pasaa, saveen eta irau ivotia gabua tawe ighazon mon mako. Ve gabua ite. Gabua tawe lezi ngalsekiin. Tamtamon eta to taan irau ivoti zi mako. ⁵ Neer tau gabua tawe ivot pani na, yau irau napakuru. Eemon irau napakur taug ne mako. Yau naghe nasavia gabua siriv tau itotoi ighe yau tapirig imbool. Tane mon ta napakur ghau pani. *
⁶ Tauvene yau irau napakur taug mako. Eemon isaav ighe naghm tauvene, ene aat naghm ngar to borauja mako. Pasaa, saveen tau nasavia to napait taug, ene onoon. Eemon lollog pa ngar tauvene mako. Pasaa, lollog pa tamtamon tipait ezag sorok mako. Naghe tighita ngar tau naghmghamu ne, ve tiloon saveen tsiau. Ve isaav ighe tighita gabuag

* **12:2:** Saveen ziiri tane, Paulus isavia tauu. I loolo pa igham pakuruun tiina mako. Tauta iwaat tauu eeza mako, ve ighuru izaa to neer ite. Saveen tau Paulus iboode na, isaav tauvene: "izala pa sambam tau imin tol pani." Yes Israela ngar toozi tauvene: Sambam tol ighengheen. Ee, ene sooso tau man tirovroov ila. Ite imin ru, ene sooso tau aaz, kaiyo ve pitum tighen ila. Ve imin tol tau ighen saanja le saanja kat, ene nugh sambam tau Maaron ileep pani. * **12:5:** 2Kor 11:30

ve tipait ghau, ene poia.

Saawe tau tapiriin imbool, Krisi ipapalot ghiit, leso tayooz ariaan

⁷ Maaron ivotia gabua popoia katini payau. Eemon i loolo pa napakur taug pa ngar tau i igham payau ne mako. Tauta ipul Sadan ivav- aghamun ghau pa patanani ee to ulig. Patanani tau ighamgham ghau ne, ene imin mbanjoonja to Sadan. Ingalngal ghau imin waar tuatau, leso napakur taug geeg sov. *

⁸ Patanani tane, yau naghason Tiina toit pai tol naghe ighamu ighau payau. ⁹ Eemon i isaav payau ighe: “Mako. Poia tsiau tau izazaa tsio, ene irao. Uil saa kaut muul? Yes tau tapirizi imbool, ene yau irau natotoi tapirig ivot ighazoon kat ila toozi.” Tauvene isaav ighe tapirig imbool, ene tintinig, ve napakur ghau. Pasaa, saawe tau taug tapirig imbool, ene Krisi tapiri tiina igheen tsiau. *

¹⁰ Tauvene isaav ighe nataghon Krisi, ve naya- maan taug naghe tapirig imbool, ve tamtamon tipamayanin ghau, ve tigham saghatin ghau, ve tighur patanani payau, ene lolog poia mon. Pasaa, saawe tau tapirig imbool, Krisi ipapalot ghau pa tauu tapiri. Tauta nayooz ariaan. *

Paulus igham ngar naol pa yes Korin

¹¹ Oyai, yam Korin agham ghau nasavia saveen imin yes boraunja wa. Imin ta yam apait ghau pa uraat tsiau, kanan poia. Eemon yam agham tauvene mako. Onoon, yau njeer sorok. Eemon yes

* **12:7:** Ga 4:13+ * **12:9:** 2Kor 11:30; Pil 4:11+ * **12:10:** Ro 5:3; 2Kor 13:4

mbanjoonja tau yam aghit zi aghe ezazi tintiina na, yeŋa raratemai. Saa ngar tau yes tighamu, ene yau naghamu paam. *

¹² Ngar ve uraat tau naghamghamu ila sosomim, ene itotoi ighe yau mbanjoonja tauu to Krisi. Pasaa, nayooz ariaan pa badoon patanani, ve Maaron ipalot ghau gha naghams gabua ngeretazi ve uraat tintiina ivotvot. Tauta itotoi ighe i ileep tomani ghau pa uraat tsiau. *

¹³ Laak, yau naghams saa sosor payam? Ngar eemon geeg tau naghams payam na, ene ite rig pa ngar tau naghamsgham pa lupuun siriv to Krisi. Ene nayok pa aghams leg atuya mako. Naghams tauvene pasaa, lolog pa naghams patanani payam mako. Ighe yam aghita aghe ngar tsiau tana iduduun mako, na apul sosor tsiau! *

¹⁴ Yau nagig gham pai ru wa. Ve aazne, matag injal naghe nalat naghits gham muul imin pai tol. Ve irau naghams patanani eta payam mako. Pasaa, lolog pa naghams gabua tsiam mako. Yau naghams ngar pa yam taumim. Naghe lolomim ilam tsiau, o poi. Aghita. Geegeu tindoundou gabua pa uleer tamazna ma tinazna? Mako. Yes geegeu tileep ila tamazna ma tinazna nimazi. *

¹⁵ Tauvene isaav ighe yau narei taug tomania gabua tsiau isov to nauul gham, ene lolog poia mon. Ma mindai? Ngar tsiau tau lolog igheen tsiam kat, tauta ighams gham lolomim payau geeg mako ne? *

* **12:11:** 2Kor 11:5 * **12:12:** Mk 16:17+; Ro 15:19 * **12:13:**
2Kor 11:9 * **12:14:** 2Kor 13:1 * **12:15:** Pil 2:17; 1Tes 2:8

¹⁶ Tauvene yau lolog pa naghām patañani payam mako, tauta nayok pa aghām leg atuya mako. Aiyo, saveeñ tane imuul ta sene. Tala geeg sov.

Yau nawatagh: Zeran siriv tau tileep tomani gham na, tinğalñgal saveeñ payau tigde: “Neer tawe, i irao pa ghamuun karom. Onoon, i iyok pait to tagham le atuya mako. Eemon ilam itombaan ghiit, ve iyauur maet tau tagooga pa uleeñ na ve ighamu imin le!” ¹⁷ Saveeñ toozi tawe, yau nakankaan pani. Yes tau nambaan zi tilat payam na, toozi eta imin eez payau to natombaan gham ve nayau gabua tsiam? Mako. ¹⁸ Onoon, yau ta napalot Titus pa saveeñ gha ilat. Ve nambaan toñvetaz toit ite ilat tomania. Ve mindai? Titus itombaan gham, ve iyau gabua tsiam? Yam awatagh: I irau ighām ñgar tauvene mako. Ve yeiru Titus ñgar tsiei ve gabuamai raraate. *

Ñgar siriv to yes Korin tau Paulus loolo pa ghi-toon zi mako

¹⁹ Mindai, yam aghe saveeñ tau niboode ila rau tane, ene to nipoon taumai? Mako. Yei nisavia saveeñ tane ila Maaron maata itaghon Krisi ñgar tooni. Pasaa, yei nipaak Krisi ve nileep ila tooni. Yam toñvetaz, lolomai igheen tsiam kat. Tauvene ñgar isov tau ninghamghamu ne, ene to iuul gham ve ipalot gham. ²⁰ Eemon yau naroi: Saawe tau ighe nalat, ene pale naghita ñgar tsiam le irau lolog mako. Ighe tauvene, ene pale yau nayaon gham ve naghām ñgar tau irau lolomim mako na. Pasaa, matag inğal naghe saawe tau nalat, ene pale naghit

* **12:18:** 2Kor 8:6, 8:16+

gham aghamgham n̄gar sasaghati naol tauvene: Aparzoor gha akuup taumim ala soghan soghan, ve n̄gar tsiam iyaryaṅ aghe atatan zeetmimṅa, ve agham zi titaghon n̄gar tsiam mon. Ve atemim yavyav, agham n̄gar pa taumim mon, aṅgalṅgal saveṅ pa zeetmimṅa, asisinai zi, apapait taumim ezamim, ve aghamgham n̄gar sasaghati siriv paam tau ireureu lupuuṅ tsiam.*

²¹ Ve naroi pa gabua ite paam: Isaav ighe namuul nalat, ve naghit gham agharaat taumim soone, ene pale Maaron ipamayan̄in ghau ila matamim. Mako lolog ipataṅan, ve nataṅ pa eval tiina tau tigham sosoṅ, ve titoor n̄gar toozi soone na. Ene nasavia yes tau n̄gar toozi iṅgalaṅ mako, ve matazi ghaara imin n̄gavuun, ve tila pa naghozi mon ve tigham n̄gar sasaghati maata maata.*

13

Tagabiiz poghania tauun pa ghuruuṅ ila toit

¹ Yau nalat naghit gham pai ru wa. Ve aazne naghe naghām laghoṅ tsiau ite muul imin tol. Leso nawatagh katin n̄gar tsiam. Pasaa, Maaron aliṅa isaav tauvene:

“Tamtamon ru ma tol aat tighita gabua pa tauzi matazi ve tipariaṅ saveṅa, o taghur ila taghe ene onoon.”*

² Saawe tau nalat naleep tomani gham imin pai ru, yau nasaav ariaṅ payam naghe ayamaan gham pa n̄gar tau aghamghamu na. Ve aazne, naleep malau, ve nayol aliṅag muul. Isaav ighe namuul

* **12:20:** 1Kor 4:21; 2Kor 10:2 * **12:21:** 2Kor 13:2 * **13:1:** Lo 17:6

nalat, ve naghita yes tau muun tigham sosor na titoor ngar toozi soone, ene irau naghurghur zi mako. Pale naghur patajani pazi. Ve yes mon mako. Tamtamon siriv tau aazne tighamgham sosor na paam, irau naghurghur zi mako. ³ Aazne, ngar tsiam iyaryaaj aghe le aghita gabua eta imin ilaal payam. Leso awatagh aghe yau navotia Kriisi aliija payam. Tauvene yam pale aghita. Eemon Kriisi tapiri igheen soghan payam mako. I ighamgham uraat ila sosomim toman tapiri tiina. Ve yam aghilaalo mako. ⁴ Onoon, saawe tau Kriisi imaat izala ai pambaroon, tamtamon tighita tigde i le tapiri mako. Eemon Maaron tapiri ipaburiginini pa mateegh, ve aazne i ileep maata yaryaare. Yei tauvene paam. Tapirimai imbool. Eemon nipaak Kriisi ve nileep ila tooni, tauta Maaron tapiri ipalot ghei pa uraat tsiei, lesu niuul gham. *

⁵ Agabiiz poghania taumim: Ngar tau aghamghamu na, itotoi ighe yam aghur ila, ma mako? Ve yam irau aghilaal aghe Kriisi ileep ila lolomim, ma mako? Anumeer taumim sorok sov. Pa aat aghur ila mako ma vene. ⁶ Ve yei nighur ila tauvene: Isaav ighe agabiiz ghei, ene pale aghilaal aghe yei mbanooja tauu to Kriisi. ⁷ Yei nighason Maaron to ipalot gham, lesu agham ngar saghati muul sov. Pa nighe le ataghon katin ngar isov tau iduduun ila i maata. Ve isaav ighe tamtamon tigabiiz ghei tigde yei mbanooja tauu to Kriisi, ma tigde yei nigham karom pa uraat tsiei, ene kaut sorok. Eemon yam aat ataghon katin ngar duduunja, o agham ghei lolomai poia. ⁸ Pasaa,

* **13:4:** 2Kor 12:9; Pil 2:7+

yei irau nizoor saveeŋ onoon mako. Yei nileep to nipariaaŋa. ⁹ Tauvene isaav ighe tamtamon tighit ghei tighe tapirimai imbool, ene poia. Eemon nighe yam ayooz ariaaŋ pa ghuruuŋ ila tsiam, o lolomai poia. Tauta saawe isov, nighurghur gham ila sunuŋ tsiei, ve nighaghason Maaron to igham uratoi gham le ŋgar tsiam isov iduduŋ mon ila i maata.

¹⁰ Saveeŋ tane, aazne naleep soghan ve na-boode ilat payam. Pasaa, lolog pa nalat ve naghham saveeŋ ariaaŋa payam mako. Onoon, Tiina toit ighur ghau to naghham uraat tauvene payam. Eemon yau irau to navaghamunia tamtamon mako. I ighur ghau to napalot tamtamon, leso ghuruuŋ ila toozi ivot imin tiina ve iyaryaŋ.
*

¹¹ Yam tonvetaz, naghe napasov saveeŋ tsiau. Yam asov alooŋ saveeŋ palotiŋ tsiau tane, ve lolomim poia, agharaat ŋgar tsiam, alup lolomim imin eemon, ve ataghon ŋgar luuma mon. Leso Maaron tau loloo igheen toit ve igham ghiit taleep poia toman loloo luuma na, ileep tomani gham.
*

¹² Tauvene lolomim poia pa taumim ve avataki nimamim*
itaghon ŋgar to iit tamtamon to Maaron.*

¹³ Maaron tamtamon tooni tau tileep ta sene, tigham aaz poia toozi ilat payam.

* **13:10:** 1Kor 4:21; 2Kor 2:3, 10:2, 8 * **13:11:** Ro 15:33; Pil 2:12, 3:1; 1Tes 5:16 * **13:12:** Paulus ibood ighe: 'Avaghani avomim.'

Ene eez toozi tau itotoi ighe lolozi pa tauzi. Ve iit tagham tauvene mako. Tayaŋin pa tamtamon, mako itiŋa tavataki nimaan.

* **13:12:** Ro 16:16

¹⁴ Poia to Tiina toit Yesu Kresi iza to yam asov,
ve ŋgar to Tamaan Maaron tau loolo igheen toit
kat na igheen tomani gham, ve Avuvu Patabuyaan
ilup gham amin eemon. Onoon.

**Maaron Saveen Tooni Patabuyaang
The New Testament and portions of the Old Testament
in the Tuam dialect of the Saveeng language of Papua
New Guinea. The Saveeng language is also called the
Mutu language.
Sampela hap Buk Baibel long tokples Saveeng Tuam
long Niugini.**

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

PDF generated using Haiola and XeLaTeX on 22 Feb 2024 from source files dated 31 Aug 2023

adb844f0-d769-5b05-9dd0-7c01fca938bb